

精鈔
大字

隨

園

全

集

欽定四庫全書

隨園續同人集卷二 文類

與隨園太史書

嵇璜

前詩稱述頗有傑句。及接閱圖卷。適有沈將二公。慶陳二公子。及策杖橫琴。攤書垂釣諸韻事。而無置酒賞花之舉。與詩意不合。又思名園名繪。與者不過三四人。而吾兄平昔知交。海內名人最廣。如嬾拙之鄙人。且不得與。豈亦有數存乎其間耶。大抵此圖。以賓就主。一時偶然之會。非若古之七賢六逸。他人莫得與者比也。因復作七古一首。書中用古法。直書諸君子名。恐讀者或以為太直。即裁去此篇。止存二律亦可。作字手硬。入後頗佳。一笑。吾兄何日復至吳門。弟於春三便當北上。後會未卜。仁圖良晤。以慰夙心。

寄簡齋先生書

嚴長明

春季先生周甲之辰。此時正在吳中大舉對山百穀兩先生故事。侍以山川修阻。不獲隨蘇小張媚之列。叩叩拳拳。進白雪之觴。奉青綾之曲。悵何如之。刻下本擬屏當南旋。但主人維繫之意甚殷。未忍遽別。且有府志之修。一時未能卒業。向見尊集闕中懷古之什甚多。便中交寄舍下。以光志乘。侍前者行次興平。偶及尊作馬嵬四絕。中丞雖誦迴環。幾於謨拜。是日遂問訪太真故冢。則已半沒榛蓬。中丞因捐清俸。重飭券牆。並仿吾鄉麗華小祠。為建丹楹。刊置四詩於壁。以當迎送神曲。先生偶爾興懷。其效迺至於此。玉環有知。必生冥感於九華帳裏。又將兩淚闌干矣。

此誠佳話。恨未能文以紀之。相晤之期。想在中秋前後。邇來引寓官齋。端居多暇跡。雖東冶心在南國。引領倉山。未由假翼。率此佈候。邇安。

又

今春正月。侍又發轍南還。故鄉風土人情。無可措意。所不能忘者。妻孥而外。惟先生耳。行次滁州。見兒輩詢及興居。據云二月望後。已方舟南下矣。侍神味為之索然。頗有刻曲迴舟之意。抵舍後。躬謁隨園。問候夫人起居。旋即接駕吳門。歸晤方甫參兄云。張靈官於閏三月南來。與先生相遇於大庾嶺頭。計程此日。文從。嘗已久莅羊城。風雨對牀而外。數昌華之荔。收東莞之香。數合浦之鴛鴦。夢羅浮之蝴蝶。想見老子婆娑。興復不淺。但恨身無羽翼。不能與霞裳三兄左右淮南。共作雲中雞犬耳。故山猿鶴。相望頗殷。慎毋謂此間樂不思蜀。令其相怨一方也。

又

於灞水橋頭。接讀芳訊。如見鬚眉。歡喜無量。侍於五月九日。偕中丞查勘東路臺站。時以雨澤。營期中。丞欲升華頂祈禱。遂同九日躡屩登山。攀蘿捫繻。竭兩日之力。直造落鴈峰頭。禱於金天宮內。甘霽應期。復冒雨上摘星巖。即李青蓮所云。呼吸通帝座處也。下瀕洞以絕地上。寥廓而無天。其間雷風雨雪。日月星斗。隱見閃屍。怪噪慘感。皆非人間。經見景象。昔黃龍禪師。登我眉絕頂。望空狂叫曰。身到此間。無可言說。惟有放聲大哭。足以酬之耳。信宿三日。下山收召魂魄。既喜。

此身復為我有。更喜筋力健在。將來儘可於三山二水間。追隨杖履也。來書云。欲為魚門志墓。此同聲所欲請者。所須履歷。侍亦記憶不真。僅就所知者寫上。外古文二冊。侍於其殘稿中選出者。向於魚門服其詩而薄視其文。今閱諸作議論。頗能不隨流俗。文筆亦自雅潔。渠生平最服震川望溪。看來竟可追蹤。其後至詩自五十以過。皆闕冗無一合作。其去賢意心餘兩君尚遠。無論吾先生也。今校對未完。先寄上一閱。

又

廬陽地本荒陋。向有書院。不過冠者五六十人。童子六七人。點綴景色而已。近日各屬開風至者。約可百人。其中頗有才貌雙清之士。堪以儲館閣之選者。所居小有池塘竹樹。每日晨起。諸生同業而外。尚有鳴鳩乳燕。曲蟾青蛙。喧聒綿蠻。以破先生岑寂。平生讀書萬卷。無一字得力。惟少時聞先生云。事到好時須住一語。至今頗覺有當於心。去歲歸里。忽欲不往中州。愛我者莫不惜其失冀。誰知九州之外。復有九州哉。聞去此九十里。有浮槎山。已屬子進。來時順到一看。如果可遊。秋間當以肩輿來約杖履。且令窮荒人士一識韓蘇耳。錢太守年甫六十。頗露老態。頗異疇昔。每相晤。必念及先生也。再綿莊集。前曾屬戴未堂編校一次。意頗未愜。須得一月空閒。便可收拾完善。但外間頗難得此一月也。秋冬返轡。當即料理付梓。以酬付託雅意。集中言易者十之五。言羣經者十之三。細加校勘。自當以易學為上。但其中疎漏甚多。如謂周始有易名。不知

夏商之易已見周官。謂卜筮因象象而作。不知昆命稽疑已見禹謨洪範。太極生兩儀經有明文。而謂昉于濂溪之類。至欲以易簡二字括盡全經。則平時宗法字靜陽明之過也。至其心胸闊大。不受康成叔重牢籠。亦不震於退之永叔。因文見道之業生漢宋而後。直欲置身千載上。接孟氏之傳。真有鳳凰翔于千仞氣象。觀其生平往來書疏。與公文字之緣最深。倘藏弄尚有鴻篇為目錄中所未載者。祈錄一副本見遺。意欲即在關中付梓。恐將來歸後。又無餘資也。

上隨園先生書

錢汝誠

景仰高風。自得為後輩來。二三十年如一日。惜未曾於都下親侍杖履。耿耿至今。每捧閱前輩片楮寸箋。皆從性情流出。風格適上。所謂大雅之遺。先文端公懿好獨深。於前輩器重尤軌。茲當領帖之時。忽拜輓律大作。不孝跪陳靈次。涕泗交流。雖倚廬荒冗。惘惘無知之際。回環泣誦。如聽唐人清商清角之音。真絕調也。先文端於九原亦當頻首。肅此佈謝。兼候起居。感佩欽企之忱。殊未罄於子墨也。

小倉山房文集序

沈石鱗

天下有文人之文。有豪傑之文。紆餘細潔。規行矩步。文人之文也。若夫豪傑之文。雲蒸龍變。隨感即發。奚暇較深淺商工拙於其間耶。漢唐宋以來。能為豪傑之文者。代不數人。西漢時賈誼司馬遷其尤者也。相如子雲漸趨雕琢。樸茂之意少矣。唐之文章。渾渾灑灑。不可窺校者。獨韓退

之一人。峻潔如柳子厚。猶不得與抗習之可之。心摹手追。唯恐不逮。籍湜輩走且僵矣。宋自歐陽永叔而下。明允介甫子由子固。皆以文名世。至問所謂雲蒸龍變。隨感即發者。北宋則推蘇子瞻。南宋則推陳同甫而已。甚矣哉。豪傑之人文之未易有也。求之近代。吾師袁存齋先生。其庶幾乎。先生天才警挺。於書無所不窺。青年負用世才。由詞臣出宰江南。一時公卿俱疑公文人也。未必解吏事。惟鄂文端公。史文靖公。獨信其能。果下車以來。決獄如神。豪猾屏迹。其所施設。雅近古之循良吏。以其暇招文士飲酒賦詩。麟與秦澗泉狀元。朱本楫進士。皆當時門下客也。久之薦牧高郵。部議尼之。先生意不通。遽以太夫人春秋高。終養乞歸。寓金陵小倉山。盡心色養。蒔花木。疏沼泉。專以文史自娛。當其意之所到。放筆旅行。凌紙怪發。如天馬騰空。如黃河奔湧。如龍蛇虎豹變現。而出沒如雷霆風雨。交雜而並至。豈非所謂豪傑之文。不屑屑於深淺工拙之較商者耶。

小倉山房文集跋

廣東 楊中興

中興聞隨園太史名久矣。曩在筠時館師處。授先生制藝。為予言。其時文即古文也。時未暇首耳。治也。越二十年。予講學端溪。先生弟香亭太守。示我袁氏三妹稿。乃隨園所編次。人與文俱奇。目治也。又三年。隨園來端州。一見如舊相識。因得讀其全集。不禁嘆曰。古文在茲矣。為卷二十有四。續編一冊。傳志雜著。各種俱備。不憚炎暑。而卒讀之。愈進愈奇。不拘一格。想其旁搜遠紹。日與

古人相晤對。廉辨折中。乃能破庸人之論。自鑄偉詞。而言無疎闊。其激而發之也。若擎雲托月。浩乎莫測。其蟠際。其固而存之也。若龍蟠屈伸。淵乎莫究。其奧蘊。至記載事言。揚詡德業。提要鉤元。仍稱量而出。犁然有當於人心。蔣太史題其文曰。胎息元氣。觀物求根。嶽峙瀆流。天結地構。可謂善於形容。杭太史曰。不落一凡字。更為知言。余何能更名其狀。惟是居恒論人有才。或歎於學有學。或短於才。即二美并。而窮於遇。不克竟其學以充其才者。亦可惜也。今太史兼而有之。觀隨園六記。具見生平。少登清華之選。長肩民物之任。迨循良報最。而眷戀所生。辭榮初服。適彼樂土。餐飫讀書。卓然為當代著作手。若造物有心。留以有待者。中興年已九十。遠隔八十里。喜太史之來。愁太史之去。所以心不能已。而私一言。以跋於後。

上簡齋先生書

是鏡

久仰芳名。無由御李。往春道經白下。得介嵇少宰。晉謁隨園。雖戶迫通衢。經庭寂若披帷。斯在一見。惟然。考古論學。有如夙契。始知名下無虛。不覺令人意盡。蒙問禮制。明堂之疑。具徵卓識。舊謂明堂即大廟。乃本於明堂位。大廟天子明堂之說。陳澧謂魯無明堂。而大廟如明堂之制。天子五門。路應雉庫臯由內而外。路門亦曰畢門。向遵泰山觀日出。泰山之麓。明堂遺制猶存。乃九門而非五門。與此註不符。蓋明堂位先儒多謂劉歆楊雄輩偽撰。誣罔周公。以阿諛王莽。觀其篇雜奏不倫。違禮踰制。全無忌憚。可證。但孝經謂宗祀文王於明堂。以配上帝。究未知其制何若。若

以為明堂即大廟。禮無明文。見於經圖者。亦係後人懸擬。未可盡信。若以為洛邑朝諸侯之所。情理尤為不協。誠如尊疑所云。質之綿莊先生。其說云何。先生深於三禮。考核精詳。必有確據。惜不及面聆其誨也。承約返棹下榻。再炙清輝。兼示大著。同行敝友。謂時當歲暮。諸務紛如。風利不泊。豈謂一會晤。一止宿。亦有定數。其間耶。或未能如約。鴻便尚祈不吝示教。為禱。所託舜山藏書。別後曾為措意否。尹制軍回轅。見時敢希面報。實園風景甚佳。內雖靜。而外則囂。且門道朝對。皆欠安吉。似非鸞鳳所宜久棲。忝蒙厚愛。敢貢愚忱。

答隨園先生

周 槩

二徐說文。本楚金為優。鼎臣標其書為五音韻譜。於書名無當。以四作五。指聲為音。寒山辨之。誠是。蓋諧聲之義。二徐均有所失。究其生病。胥昧於陰陽平。而混呼切脚耳。如玉鑰匙指南。標射諸法門。妄為遷就音韻。歸譏其反韻。猶可少諧。平韻飄揚。無所適從。不其然哉。按繫傳反切未翔作。茲不盡論。姑舉開卷二三字如一字。翔云。伊質反。五音韻譜云。於悉反。兩反俱得壹。是為合作。音韻歸謂反聲。猶可少諧者是矣。至天字。翔云。聽連反。五音韻譜云。他前反。兩反俱得田。而天字真音。當用梯烟反。或聽尖反。國書反切。較勝諸字書。正此類也。華嚴字母。西學耳。目資俱為洞底。不由妙音入。難臻三摩地。詎曰淺末哉。又上字。翔云。時快切。五音韻譜云。時掌切。按時掌得上之上聲。於去聲則漏矣。時快切。僅得上之鄰近聲。而上之真去聲。終未出。必須如玉。

篇市讓切乃合。即此開卷二字已謬。卽如是故曰二徐於反切則均失之。鼎臣本頗簡。究亦不過託寡辭免咎之計。善用其短耳。若小徐繫傳本祛妄之說。六義之解。實多合論。卽亥字注義徵取祕法。最爲佳妙。尙魏太常作精蘊。反少之耶。然楚金可議處亦甚夥。如始一終亥。但謂部次之目。則可乃以意聊爲文。二篇盡屬強窒。余讀至末曲木也。角亦曲骨也。故次之以角。骨之堅者爲角。草之堅者爲竹。故次之以竹。手臂所連爲平。故次之以平。平在人之後。隨人者也。女亦隨人。故次之以女等語。幾同市井譚語。絮麻韋藤堆實塔矣。不值一喙。善讀者亟當摘註之。趙氏長箋明知其謬。猶存卷中。謂可當記事珠。誤也。且引宋人效作易卦敘傳。則又擬失其倫矣。以上諸失俱在譯述者。至刻板鈔錄。往往無善校。最爲吾人披閱之累。繫傳本凡三見。俱非鑒藏佳本。今此本訛字甚多。如目錄象字類。至後冊竟遺却象字三文。若細校似此尚多。又上字注當是時快反。茲本抄寫誤作時快。快之與快。毫釐千里。亦未得遍校想反切之字誤者亦必不少。六書不修經史義晦。奈何奈何。

覆隨園先生書

河南胡季堂

陶方伯來。接奉手書。深紉存注不暇。遠道當肅一楮奉覆。想登記室矣。家觀察到都。又得朵雲。別後三秋。常殷懷念。屢承蘭訊。不啻面談。令人神馳於小倉山畔。而不能自已。閣下以玉堂著作之才。試花縣絃歌之政。退而萊衣舞綵。將母情深。奉八十二歲之高堂。讀二書餘卷之書史。扶大

雅於江左為名士之靈光。此種風裁。人生罕覩。視東華朝夕在公者。不大有間耶。前此奉懷。一律恐不足為照於萬一。來書乃加殷許。敝帚亦享千金。真荷嗜加之愛矣。弟今秋扈蹕出古北口。凡經興州抵水蘭。一路川原陵樹。頗獲勝觀。且塞上之風烟。秋郊之獮狩。尤擴見聞。竊不自揣。積有篇什。節錄寄上。倘和教一二。感甚幸甚。

又

僕歸時。順經攝山。稍一登眺。幽居雲石。處處入勝。登最高峰。望江。尤為大觀。想先生近在指顧。不啻公家湯沐。胸中裝滿烟霞。自然落筆超雋。視僕輩薄領紛如。偶一乘閒流憩。旋即去之。其勞逸何似。然既已登歷。差免寶山空手。前賢有句云。天公已入休嫌暫。尚有終身未到人。讀之聊以自慰也。惟名園在望。而徒有兼葭白露之思。豈真個海上神山。定有仙風引去耶。瞻望勿及。殊難為懷。中庸曰。天地之大也。人猶有所憾。僕亦有憾於小倉山矣。一笑。

寄隨園世兄書

慶桂

家嚴近年以來。常多疾病。平素又最不信醫藥。桂前歲冬底。自庫倫回京。見老人精神疲倦。行走亦頗遲鈍。殊深驚異。惟有晨昏調護。默禱上蒼。願將身代。不意於去夏四月二十二日。竟亦見背。桂抱恨終天。曷其有極。彼時欲具啟奉聞。緣哀痛之際。諸多疎忽。而又未逢便羽。及至百日脫孝後。即前赴熱河叩謝天恩。復隨圍塞外。碌碌風塵。往還兩月。今春又扶輦出關。二月安葬事畢。

三月旋都。乃承世兄關愛情殷。致書慰問。真令弟感泣靡寓。先君吟咏詩章。本係一生心血。愚兄弟輩謀欲付之剞劂。以昭永久。序文一事。公同酌商。非足下之大作。則萬萬不可。非足下之交情才思。亦斷斷不能作也。正思修札上請。孰知迢迢南北。竟有同心。千古傳文。隨書寄到。使弟輩捧讀之餘。泥首涕流。席公刻下尚未抵京。隨園華翰。因致稽遲。關山千里。消息空傳。鴈杳魚沉。繾綣何極。弟於去秋九月間。奉 特旨。在軍機大臣上行走。此乃追念先人不盡之殊恩。更施之於嗣子。稍具人心者。敢不勉隨步武。仰報 君親。惟是任重材庸。定難承受。世兄通家至好。不比泛常。愛我既深。教子必切。尚望時惠德音。以匡不逮。先君之靈。實式憑之。

又

弟春間扈從山東。曾修寸楮。藉達離悵。未識可邀青照否。頃於奇麗川方伯信中。接披華翰。獲悉世兄盪滌西湖。歡聯親故。知弟前往高郵。即行返棹。足徵摯愛殷拳。久而彌篤。欣感彌深。第天不假緣。失於咫尺。白髮心交。缺於一晤。令人悵悵轉滋也。來書內有明歲危於龍蛇之語。想散仙風骨。定與松鶴齊年。其相士之妄言。自宜妄聽之耳。再世兄鴻才雅望。人所共欽。何彼昏耄。偏與為難。真可謂拂人之性者。而今災果逮其身。殊堪一快。並聞近年來。又與麗川契合。此正端人取友必端之明驗。現今補山制軍。移旌白下。與世兄既屬桑梓之親。兼有應求之好。牙琴並奏。其樂何如。引睇江雲。可勝企羨。弟於正月中押解人犯抵灤。即蒙 召見。奏對之時。天顏甚喜。

特命歸省慈闈。再行在。似此。聖恩體恤。至渥。極優。諒世兄聞之。亦必代為歡暢。昨已馳赴山莊。照常侍直。近狀平安。差堪告慰。

又

通家世好。睽隔多年。不意去冬。猥承寵命。竟能舊地重遊。方擬遣人迎迓。迺蒙鼓棹先來。快覩精神。豐饒備徵。雅愛勲拳。方知他鄉之遇。故知更勝於久旱之逢甘雨也。但未聲綢繆。遽違光霽。因風去住。行役堪嗟。未卜何時再圖良晤。憶昨春風坐對。恍同夢境。迷離黯黯。別緒何可言宣。然征輶四出。碌碌頻年。既有此日意外之歡逢。未必無他日不期之作合。兄我與世兄。香火緣深。禱祈共切者耶。浙江審案將完。約於二十外起程。方特修函道別。適逢尊紀到杭。獲披手翰。藉悉杖履還山。起居安吉。雖慰遠懷。奈弟掛帆北上。不克紆赴江甯。盤桓片刻。白頭兄弟。咫尺天涯。言念及斯。曷勝悵悵。尚此書候。邇安。附呈微物。賀通姪迎娶之喜。

又

日昨曾泐數行。並呈拙句。由恩太守處轉致。計登青照矣。弟於月之二十日。行抵嘉興。即艤舟烟雨樓。會同長撫軍審辦畢。約出月初三四可過京江。因想弟此番奉使南來。世交緣重。屢獲歡逢。離懷雖慰。但從此挂帆北上。未識頭白弟兄。何時再晤。言之黯然。倘復蒙鼓棹而來。重圖雅聚。一話別悵。則深所願。但高年之人。不敢請。亦不克請也。李太守續蘭亭修禊圖。名作林立。

落筆殊難。然既承世兄推獎。未敢固辭。率題一章。錄稿呈政。

又

昨自嘉禾轉棹。曾肅寸牋。交差官寄往。未識可登青覽否。日來陰雨連綿。風色不順。於初四日始抵丹徒。適郭中翰來迎。得披手翰。纏綿肺腑。銘感奚如。滿擬海天兜率。又作歡逢。詎意詩識竟難重驗。白雲偏愛閒眠。長江不能飛渡。懷思曷極。涕淚潸然。然前此聚首兩番。亦足補二十年久違之缺。念及於斯。覺黯然傷而又欣然慰也。捧讀所題江天賦別圖。不獨韻事堪傳。且欲交情垂久。益紉才子之用心。至深至密。歡泐靡涯。予特搜索枯腸。敬酬原唱。非敢云詩。聊抒衷曲耳。霞裳高弟子。竟未來見。玉樹亭亭。空作天際真人之想。奈何奈何。所索先君詩集。及鏡面高麗紙。容俟到京。覓便寄上。

寄簡齋世兄

慶霖

久違雅教。十有五年。懷慕之私。與時俱積。弟於戊戌七月。仰蒙 聖恩。授為黑龍江副都統。自顧樗庸。獲此進步。皆由先人之餘蔭也。出京時。曾於三兄信內。附寄一啟。報聞。不意南羽浮沉。未呈記室。丑夏後。二日夜雨曉霽。公餘之暇。正在綢秋園中。蒔花種菜。忽見朵雲飛入山齋。如親故人顏色。開函展讀。相愛之情。溢於楮墨。欣甚慰甚。並承示知近況。名姝異夢。即產麟兒。光耀門楣。全家喝采。人生樂事。無過於斯。奈相隔萬里。縮地無由。且鱗鴻鮮便。未得專函馳賀。翹首江天。

實深豔羨。世兄云。六十老翁。學為人父。弟若引此例。還須十有五年。未識蒼蒼者。其肯許乎。復荷見投新什。調高詞雅。頻挹清芬。既感舊雨情多。又佩才人筆健。且知登山臨水。問柳尋花之興。依然未減。足見精神滿腹。耳目聰明。真壽徵也。或天假之緣。安知將來不重聚首於白下乎。伏望珍重。

又

五月初旬。曾具兩啟。一託將軍西公。一託司馬胡君。未識寄到否。昨聞春圃方伯。榮任江寧。香亭太守。已歸白下。鴈序聯牀。墳荒迭奏。闔街塞巷。賀客盈門。山林增色。魚鳥皆驚。真人生之樂事也。翹首雲天。曷勝豔羨。弟已作札。勸令妹夫書巢。乘時回南。既得親朋歡聚。又可抱子弄孫。詩酒陶情。以養餘年。必欲僕僕道途。勞心勞力。依然兩袖清風。何趣之有。渠去年九日詩云。怕向明湖窺白髮。曾經二十五重陽。讀之令人淚落。尚要措資捐復。殊覺多事。縱不能如世兄三十三而致仕。必待六十六乎。恐到此年紀。亦終於知進而不知退也。白香山詩云。我有一言君記取。世間自取苦人多。其書巢之謂矣。聞江南雨暘時若。轉歉為豐。世兄可免饑寒之患。欣甚賀甚。附候起居不備。

寄隨園太史書

奇豐額

自束髮受書之日。即耳芳名。迄今垂三十年矣。總以未得一見。顏色為憾。月前獲迎高躡。快挹清

標揮塵尾於風前。落珠璣於座上。平昔仰止之思。一旦得償所願。欣幸非常。實屬前緣不淺。昔人云。如公之明峻。固若瓊枝琪樹。常欲在人目前。殆為今日言也。拜送以後。不克數相見。亦未嘗一日去諸懷。留惠尊集。每盥手展誦。塵心一浣。至得意時。輒覺涼風生於松竹間。忘其為炎午之中。足見才人腸胃。清如冰雪。故能咳唾生風。不必挂笏支頤。召西山爽氣也。惟未窺全集。正如渴飲河。尚未滿腹。不知何時得傾囊相示耶。弟無夙慧。又束縛於簿書。益不克自振拔。山谷與人書云。南來拘窘吏事。雖江山相映發。心不在焉。似此情狀。當為大雅一笑。近日於堂之西偏。拓一弓地。架四面亭。為習射之所。旁構小亭。覆以棕毛。顏其額曰洗心。退食之暇。靜坐片時。聊以自慰。懷想清塵。將以安車蒲輪。奉迎芳躅。此亭有知。亦當引領。

又

暑齋勿勿晤別。原訂東返棹。再歌維繫之詩。乃盼久不至。始知一帆風利。早已暗渡吳閭。竊訝兄何竟爽前約。既而思之。安期美門諸人。遨遊海上。總如神龍挂天。見首不見尾。令人無從蹤跡。若來去之期。都被凡人扣算得出。則神仙遊戲人間。不幾與官程驛使相同耶。念此又爽然自失矣。辰下溽暑正盛。伏惟珍攝。弟於廿四日。得部咨。實授撫篆。兄期我甚切。聞之必以為喜。然而力小任重。古人惕之。兄何以教我。即昨具摺請覲。若批准。於月內即行矣。否則秋間從事文闈。撤棘後必走叩。隨園樞衣而入也。壁間畫美人。曾邀賞鑑。因囑曾君照仿一幅。奉上。渠得兄

賜題頭陀像。心感之至。故畫此幅。尤加倍出力。連日查看海塘江壩兩處。奔馳冗次。裁箋敬問近祉。

又

秋間在省時有過從之樂。別來又兩月餘矣。旁人草草。每覺容易銷磨歲月。而兄在烟霞供養中。想見山靜人壽。幾忘却人間甲子也。昨周中翰來蘇。得手書。知月初曾挈霑裳至邗上。而彼此竟不相值。想因此番回來。行走太速。或於夜中錯過。悵甚。歡甚。周中翰述及起居頤養之勝。共相欣忭。中翰學贍品粹。弟所素欽。章奏一切。尤推老手。適新任尚衣五公。於廿五日到蘇。即日已延入幕。其令郎當另為留意也。弟小春七日到京。召見三次。奏對甚久。天顏甚霽。所有囑寄各書。及慶十三兄小照。俱一一面交。京中問兄起居者。弟具述。矍鑠以對。曾於紛紛酬應時。口號絕句數首。及昨回蘇。都不省記。惟記一絕云。中侍傳宣遞膳牌。平明待詔立金階。白頭宰相關心甚。問了黃河問簡齋。蓋因阿公之問。隨園而作也。又一首云。簪筆羣仙集鳳樓。喜談前輩覺風流。不知我與先生善。翻問曾覲太史不。蓋因二三新翰林爭問隨園而作也。附聞以博一粲。

題 恩假歸娶圖跋

乾隆己未。隨園先生以翰林給假歸娶。袁所贈行詩為一冊。命工繪圖幀首。距今壬子。蓋五十四年矣。秋七月。余以監臨鄉試。至江甯。先生攜此冊見眎。墨香藻古。襲錦爛然。令人神悅。憶余自